

Newspaper	Berita Harian
Date	31 March 2016

# 'Jangan sekali-kali cuba khianati perjuangan parti'

BH - 31/3/2016

» *Najib gesa pemimpin, ahli UMNO tak gadai maruah diri demi cita-cita politik peribadi*

Oleh Mohd Hamizar Hamid  
mizar@bh.com.my

✦ Kuala Lumpur

**D**atuk Seri Najib Razak mengingatkan pemimpin dan ahli UMNO tidak sekali-kali mengkhianati perjuangan parti hingga sanggup menggadai maruah diri

untuk mencapai cita-cita politik peribadi.

Perdana Menteri berkata, amalan berpolitik yang berprinsip dan bermoral perlu dipertahankan dalam setiap tindakan mengikut Perlembagaan negara.

"Jika tidak, negara boleh huru-hara. Sekelip mata boleh hancur lebur. Apa yang hendak kita tinggalkan kepada pewaris, anak dan cucu. Kita memerlukan sebuah negara yang lebih berjaya dan kukuh.

## Elak hancurkan negara

"Jika ada kesilapan sekalipun, ia boleh diperbetulkan. Jangan hancurkan negara dan parti sebaliknya perlu kasih kepada parti dan negara," katanya.

Beliau berkata demikian ketika berucap merasmikan Per-

himpunan Ahli Persatuan Bekas Anggota KEMAS Malaysia (PBAKM) dan pelancaran Kelab Wawasan Anak Muda Perintis Intelektual SeMalaysia (WARIS) di sini, semalam.

Yang turut hadir, Menteri Kewangan Luar Bandar dan Wilayah, Datuk Seri Ismail Sabri Yaakob; Penasihat PBKAM, Tan Sri Mohd Ali Rustam dan Presiden PBKAM, Datuk Melati Ali.

Lebih 5,000 ahli PBKAM dan WARIS yang menghadiri majlis itu turut membaca ikrar taat setia dan memberi sokongan penuh kepada kepemimpinan Najib.

Dalam ucapan sama, Najib yang juga Presiden UMNO turut menempelak bekas pemimpin parti yang pernah menerajui negara selama 22 tahun dan menasihati ahli

UMNO supaya sentiasa setia kepada parti, namun kini bersama barisan pembangkang.

"Bukan macam setengah orang, dulu cakap lain, dulu suruh sokong parti.

"Di mana duduk orang itu sekarang? Dia dah tak duduk sebaris dengan UMNO lagi. Dia sekarang duduk dengan orang yang dia kata rasis, cauvinis, anti-Islam dan anti-Melayu," katanya.

Pada majlis itu, Najib turut menyampaikan Anugerah Khas Perdana Menteri kepada empat veteran KEMAS.

Mereka ialah Hassan Markom, 94, dari Batu Pahat, Johor; Wan Som Wan Ngah, 90, Kuantan, Pahang; Isa Baba, 89 dan Hamzah Hashim, 88, masing-masing dari Jasin dan Kampung Seri Minyak, Melaka.